

稱

謂

錄

稱謂錄卷十九

福州梁章鉅撰

男恭辰校刊

太醫院

太醫監 明初設醫學提舉司改爲太醫監後始爲院
使掌醫療之法院判貳之院使二人一掌印務事一
管御醫事左右院判管理教習御醫廳事明嘉靖時
號爲聖濟院留青集稱爲大良相

翰林醫官院 五代方技傳劉翰世習醫業周世宗命
爲翰林醫 祖常詩病來能召翰林醫 案五代時

有翰林醫官使宋制翰林醫官院使副各二人尙藥
奉御六人醫官醫學祇候無定員舊制翰林醫官使
四人副使二人直院七人尙藥奉御七人醫官三十
人醫學四十人祇候醫人二十人其員猥多寶元二
年始立使副直院尙藥奉御定員醫官醫學無班位
以服色爲差崇寧以後醫官又有和安成和成安成
全大夫保和大夫保安大夫翰林良醫和安成和成
安成全郎保和郎保安郎翰林醫正翰林醫官翰林
醫效翰林醫痊翰林醫愈翰林醫證翰林醫診翰林

醫候翰林醫學諸稱

尙藥監 後漢書蓋勳傳京兆高望爲尙藥監

院使

太醫令 後漢百官志太醫令一人六百石掌諸醫藥
注漢官曰員醫二百九十三人 舊唐書職官志太
醫令掌醫療之法其屬四一曰醫師二曰鍼師三曰
按摩師四曰呪禁師 案隋書百官志太常寺屬官
太醫署令丞各一人主藥二人醫師二百人藥園師
二人醫博士二人助教二人按摩博士二人呪禁博

士二人太醫令當如今之院使大醫丞如今之院判
太醫丞 後漢方術傳郭玉師事程高學方診六微之
技陰陽不測之術和帝時爲太醫丞多有效應 續
漢書東平王蒼到國病詔遣太醫丞將高手醫視病

御醫

御師 資治通鑑齊建武元年海陵恭王有疾遣御師
瞻視胡三省注御師醫師也以其供御故謂之御師
醫師 周禮天官醫師掌醫之政令

侍醫 史記刺客列傳侍醫夏無且 漢書王嘉傳侍

醫五宏等侍內案脉顏注侍醫天子之醫也

大醫 雲笈七籤軒轅本紀時有仙伯出於岐山號岐伯善說草木之藥性味爲大醫帝請主方藥

奉御 直長 舊唐書職官志殿中省有尙藥局奉御二人直長四人 職官分紀奉御掌合和御藥及診候之事直長爲之貳

奉醫大夫 唐六典龍朔二年改奉御爲奉醫大夫咸亨初復舊 文獻通攷尙藥局奉醫梁陳以後皆太醫世其職唐始改爲奉醫大夫

御醫院句當官 宋史職官志無常員掌案驗祕方以時劑和藥品以進御

吏目 醫士 醫生

醫監 醫正 唐六典醫監四人從八品下醫正八人從九品下注云後周有醫正上士中士下士隋煬帝置醫監五員醫正十員唐因之隋又有藥園師藥園生等唐因之

醫工 唐六典醫工一百人注云漢有醫工長第五倫補爲淮陽王醫工長是也

醫生 典學 唐六典醫生四十人典學二人注云後周醫正有醫生二百人隋太醫有生一百二十人皇朝改置四十人貞觀後置典學二人

醫博士 助教 唐六典醫博士一人正八品上助教一人從九品上注云後魏有大醫博士助教隋太醫有博士二人掌醫生武德中博士一人助教一人貞觀中改置一人又置醫師醫工佐之

鍼博士 鍼助教 鍼師 鍼工 舊唐書職官志鍼博士掌教鍼生以脉經孔穴使識浮沈澀滑之候以

九鍼爲補瀉之法 案唐六典鍼博士一人從八品上鍼助教一人九品下注云又置鍼師鍼工以教鍼生也

按摩博士 按摩師 按摩工 按摩生 唐六典按摩博士一人從九品下案按摩師四人按摩工十六人案按摩生十五人

呪禁博士 呪禁師 呪禁工 唐六典呪禁博士一人從九品下注云隋太醫有呪禁博士一人皇朝因之又置呪禁師呪禁工以佐之教呪禁生也 案此

卽今之祝由科也

翰林學士 宋史太宗紀雍熙四年九月癸亥校醫術
人優者爲翰林學士 案熙寧九年置太醫局以知
制誥熊本提舉大理寺丞單驥管幹後詔勿隸太常
寺置提舉一判局二判局則選知醫者爲之有九科
科置教授一選翰林醫官以下與上等學生及在外
良醫爲之學生嘗以春試取合格者二百人爲額歲
終稽其功績爲三等第補之上等月給錢十五千毋
過二十人中等十千毋過三十人下等五千毋過五

十人詳具宋史職官志

內務府

六府 禮記曲禮天子之六府曰司土司木司水司草
司器司貨典司六職鄭注府主藏六物之稅此亦殷
時制也周則皆屬司徒 歷代職官表鄭注謂周屬
司徒蓋如今戶部之三庫但殷五官既有司徒而復
別設六府則在殷時固不爲司徒之掌而與今之內
務府相近矣

百司庶府

書立政百司庶府蔡傳百司若司裘司服

庶府若內府天府之屬

太府 周禮天官太府掌九賦九貢九功之貳以受其貨賄之入凡式貢之餘財以共玩好之用

天府 周禮春官天府掌祖廟之守藏與其政令凡國之玉鎮大寶器藏焉 荀子大略篇不知而問堯舜求財而求天府注求財於六貳之博得之不窮故曰天府天府天之府藏

少府 漢書百官表少府掌山海地澤之稅顏注大司農供軍國之用少府以養天子也 急就篇司農少

府國之淵 歷代職官表漢承秦制立少府以供養
宮禁位列九卿凡諸奉御之職無所不統今以漢百
官表所載詳繹之今內務府七司諸官蓋皆有其職
焉如御府尙方東織西織是廣儲司之掌尙書內者
諸僕射署是會計司及內管領之掌中書謁者與掌
儀司相近而大官胞人則如今內茶膳房也左弋飲
飛掌弋射都水鉤盾主苑囿近於都虞司之掌也服
虔鄧展以若盧爲詔獄如淳以爲藏兵器而漢官儀
注則云有若盧獄今主治庫兵是一官而兼兩職如

慎刑司及武備院之兼職也考工室左右司空東園匠如今之營造司而尙方令又如今之造辦處也惟慶豐所掌未見於少府之屬蓋太府所兼掌耳

殿中監 通典魏置殿中監晉因之

宣徽院 冊府元龜後唐以李紹宏爲宣徽南院使兼掌內甸天下財穀皆委裁遣又孟漢瓊明宣時爲宣徽北院使 案後唐以宦者爲宣徽使主天下財穀宣徽之名實首見於此而宋因之

宮籍監提點

金史百官志殿前都點檢司屬官宮籍

和言金 卷一
監提點掌內外監戶及地土錢帛小大差發

大都留守司 元史百官志大都留守兼理營膳內府
諸邸都宮原廟尙方車服殿廡供帳內苑花木及行
幸湯沐宴游之所門禁關鑰啟閉之事

內務府總管大臣

宮正 宮伯 周禮天官宮正掌王宮之戒令宮伯掌
王宮之士庶子 歷代職官表此在今時爲內務府
大臣之職其所以秩止於上士中士下士者則以冢
宰統臨於上而諸官爲專司故不疑其秩之輕也

尙供總管府 雲需總管府 元史百官志尙供總管
府掌守護東涼亭行宮及游獵供需之事雲需總管
府掌守護蔡罕諾爾行宮及行營供辦之事 案此
與今都虞司及各處總管之職相仿其職皆正三品
則亦當今之內務府大臣矣

包衣昂邦 叩鉢齋官職攷卽內務府總管
內包衣牛錄章京 同上云卽內務府

廣儲司

玉府 周禮天官玉府掌王之金玉玩好兵器凡良貨

賄之藏凡王之好賜共其貨賄 案今廣儲司有銀庫員外郎正當此職

內府 周禮天宮內府掌受九貢九賦九功之貨賄良兵器以待邦之犬用凡王及冢宰之好賜予齒革兵器凡良貨賄入焉凡王及冢宰之好賜予則共之內者令 後漢書官志內者令一人六百石注掌中布張諸衣服

尙方令 考工令 通典周官爲玉府秦置尙方令兩漢又有考工令漢末分尙方爲中左右三尙方宋孝

武大明中改曰御府後廢帝初省御府置中署唐省
方字有中左右三尚署令丞各一人中署掌宮內營
造雜作左署掌車輦繖扇膠漆畫鏤等作右署掌皮
毛膠罌雜作席薦等事 案廣儲司有匠作之等七
曰銀作曰銅作曰染作曰衣作曰繡作曰花作曰皮
作蓋卽唐之三尚署矣

掌皮 周禮天官掌皮掌秋斂皮冬斂革春獻之共其
毳皮爲氈以待邦事 案廣儲司皮庫員外郎正當
此職

司服 周禮春官司服掌王之吉凶衣服 案今衣庫
員外郎正當此職

常服郎 通典後魏有掌服郎 案此卽廣儲司之衣
庫員外郎矣

主衣局都統 主衣局子統 隋書百官志北齊門下
省領主衣局都統各一人掌御衣服玩弄事 案主
衣局卽今之衣庫都統如今之司庫子統如今之副
司庫

典絲 典泉 縫人 染人 周禮天官典絲下士二

人典冢下士二人縫人奄二人女御八人染人下士
二人 案廣儲司織染局掌組織繪繡之事以供
內廷之服用者周官正當此數職也

和用監 中尙監 章佩監 元史百官志和用監中
尙監章佩監秩皆正三品 案此三監領各局諸庫
爲自古所未有今廣儲六庫營造入作之所司差爲
相近

都虞司

山虞 澤虞 周禮地官山虞掌山林之政令若大田

獵則萊山田之野及弊田植虞旗於中致禽而餌焉
澤虞掌國澤之政令若大田獵則萊澤野及弊田植
虞旌以屬禽 案都虞司掌府屬武職官之銓選凡
山澤采捕之事皆掌焉正周官山虞澤虞之職也蓋
虞人本田獵之官田獵爲武事故武職之銓選亦並
屬諸都虞司耳

獸人 周禮天官獸人掌習田獸 案今都虞司設打
牲官於松花江其丁曰珠軒歲覈其所納者而賞罰
之蓋卽古獸人之職也

掌儀司

侍儀司 元史百官志至元十三年以侍儀司並入太常寺二十年又別置侍儀司 案此與內務府之掌儀司相似

果房

果官 通典晉太官令有錫官果官吏各二人 案今內務果房有掌果二人正與晉同

果丞 續漢百官志果丞掌果

會計司

職內 職歲 周禮天官職內掌邦之賦入職歲掌邦之賦出 案會計司掌徵三旗園賦莊賦而稽其出納卽職內職歲是矣

營造司

將作大匠 漢百官公卿表將作少府秦官掌治宮室有兩丞左右中候景帝中六年更名將作大匠屬官有石庫東園主章左右前後分校七令丞又立章長丞武帝太初元年更名東園主章爲木工如滿曰章謂大材也舊將作大匠之材吏名章曹掾師古曰今

所謂木鐘者蓋章聲之轉耳東園主章掌大材以供
東園大匠也 案內務府營造司之木庫庫掌二人
副庫掌二人庫守十有二人掌供木材卽漢之東園
主章長丞矣據此則營造司直年大臣卽古之將作
大匠也

石庫令 東園主章令 見上注

繕工監 營繕監 通典唐龍朔二年改將作爲繕工
監咸亨元年復舊光宅元年改爲營繕監

掌治署 隋書百官志北齊太府寺統諸治東西道署

隋曰掌冶署有令丞 案通典云秦及漢郡國有鐵官晉治令掌工徒鼓鑄宋有東冶南冶各置令丞梁陳有東西冶後周有冶工鐵工中士唐因隋制於京師置冶署有令丞各一人掌造鑄金銀銅鐵今營造司有鐵庫庫掌二人副庫掌二人掌供鐵炸卽隋之掌冶署令丞歟

左校署 右校署 隋書百官志將作寺統左右校署令丞 案通典云左校掌營構木作採材等事右校掌土作瓦泥並燒石灰廂潤等事則左校署卽內務

府之木庫右校署卽內務府之房庫也

甄官署 隋書百官志北齊太府寺統左右甄官等署
令丞 案通典云後漢有前後中甄官令屬將作晉
有甄官署掌磚瓦之事宋齊北齊隋悉有唐因之掌
營磚石甃瓦則今之內務府房庫掌供石瓦設棚座
蓋並右校甄官兩署而一之矣

司竹長 司竹都尉 司竹監 通典漢有司竹長丞

後魏有司竹都尉隋曰司竹監 案內務府之器庫
庫掌二人副庫掌二人掌造籐竹之器卽古之司竹

長丞矣

甸師 周禮天官甸師下士二人帥其徒以薪蒸役外
內饗之事 案內務府薪庫有庫掌二人蓋卽此職
掌炭 周禮地官掌炭下士二人掌灰物炭物之政令
案內務府炭庫有庫掌一人蓋卽此職

慶豐司

牧人 牛人 羊人 周禮地官牧人掌牧六牲而阜
蕃其物牛人掌養國之公牛以待國之政令夏官羊
人掌羊牲 案此卽今內務府慶豐司之職

駝牛署 司羊署 隋書百官志北齊太僕寺統駝牛
司羊等署令丞駝牛署有典駝牝牛特牛三局司羊
署有特羊牝羊諸局並有都尉 案此亦今慶豐司
之職掌也

典牧署 牛羊署 隋書百官志隋太僕寺統典牧牛
羊等署各置令丞

慎刑司

方士 周禮秋官方士掌都家聽其訟獄之辭辨其死
刑之罪而要之案內務府慎刑司掌讞三旗之獄與

此職相似

上駟院

御馬監 博物典彙在內有御馬監掌天子十二閑之政

阿敦衛門 皇朝通攷順治初年設御馬監十八年改爲阿敦衛門以大臣侍衛管理康熙十六年改爲上駟院

尙廐院 金史百官志尙廐局掌御馬調習牧養以奉其事 案此仍遼制而爲名正今上駟院之職也

左右騏驎院 左右天駟監 宋史職官志掌國馬別其駑良以待軍國之用

天驥府 詳見鸞儀衛控鶴注

上駟院大臣

校人 周官夏官校人掌王馬之政

尚乘局奉御 舊唐書職官志奉御掌內外閑廐之馬

注曰一曰左右飛黃閑二曰左右吉良閑三曰左右龍媒閑四曰左右駟騄閑五曰左右馱騏閑六曰左右天苑閑 案北齊太僕驛驢署有奉御十人管十

二閑馬隋煬帝取之置尙乘局署奉御二人唐因之增置奉御二人龍朔二年改爲奉駕大夫者卽此

天廐使 宋史太宗紀新作天使左右監以左右飛龍使爲左右天廐使又雍熙二年幸天駟監賜使從臣馬

羣牧司制置使 騏驎院句當官 文獻通攷宋有羣牧司制置使以樞密使副爲之掌內外廐牧之事周知國馬之政又有騏驎院句當官以諸司使副及內侍充掌牧養國馬以供乘輿及頒賜

阿敦侍衛

阿敦侍衛 會典上駟院有阿敦侍衛二十有一人掌侍直騎試 御馬及閱馬於廐羣則率其長若副而供令

技巧六廐令 漢百官公卿表水衡都尉屬官有技巧六廐令丞師古曰天子六廐未央承華駒騎馬輅輅大廐也據此表大僕屬官已有大廐未央輅輪騎馬駒騄承華而水衡又云六廐技巧官是則技巧之徒供六廐者其官別屬水衡也 案所謂技巧卽侍

直騎試之謂歟

醫師長

醫師長 副醫師長 會典上駟院有醫師長二人副

醫師長蒙古二人掌治馬駝之疾

獸醫 巫馬 周禮天官獸醫下士四人掌療獸病夏

官巫馬下士二人醫四人掌養牧馬

獸醫博士員 隋書百官志太僕寺有獸醫博士員一

百二十人

馬廐官役

廐長 廐副 廐丁 會典京師各廐均設廐長一人

廐副二人廐丁二十人

趣馬 廐人 圉師 圉人 周禮夏官趣馬下士阜

一人廐人下士閑二人圉師乘一人圉人良馬匹一人驚馬麗一人 案趣馬廐人如今之廐長廐副而圉師圉人則如今之廐丁耳

典廐署令 典廐署丞 通典唐改龍廐爲典廐署令二人丞四人掌在廐繫飼馬牛及雜畜事

未央廐令 大廐令 家馬廐令 通典東京有未央

廄令掌乘輿及宮中之馬 案歷代職官表通典又
載魏改未央廄令爲乘黃廄驂駟廄驂駟廄爲後代
龍廄內廄之所自始而晉宋以後遂分屬門下省則
正上駟院之職也 案百官公卿表云大廄未央家
馬三令各五丞一尉師古曰家馬者主供天子私用
非大事戎事軍國所頒又武帝太初元年更名家馬
爲捫馬應劭曰主乳馬取其汁捫治之味酢可飲因
以名官也師古曰捫音徒孔反今上駟院掌 御馬
之政令凡供直曰陳 御馬四於 景運門外正與

家馬義合則家馬廐令及大廐令亦並當如上駟院之左右司郎中員外各職其各有廐丞廐尉亦主事筆帖式之類歟

承華廐令 古今注漢安帝元年置承華廐令 案百官公卿表止言承華監有長丞而不言有廐令殆廐令卽監長之別稱耳

牧橐令丞 昆蹏令丞 漢書百官公卿表有牧橐昆蹏令丞應劭曰昆蹏好馬名

騾驥廐丞 袁宏後漢紀靈帝初置騾驥丞

移中監 漢書蘇武傳稍遷至移中廢監注移中廢名爲之監也

臨漢監 唐書孟簡傳時有詔置臨漢監以牧馬命簡兼使職

牧場官役

監長 監丞 漢書百官公卿表太僕秦官掌輿馬有兩丞又龍馬閑駒橐泉駒駝承華五監長丞 案漢之五監各有監長監丞如今邊外牧場之騾馬羣馴馬羣每羣皆設牧長牧副牧丁以任其牧事也

駿馬監 騎馬令 馬監 漢書傳介子傳介子以駿
馬監求使大宛 王海武帝以嚴安爲騎馬令金日
磾拜馬監 案漢百官公卿表車府路輪騎馬駿馬
四令丞則駿馬監殆卽駿馬令也且既有駿馬令騎
馬令亦必有駿馬丞騎馬丞也令當如今之牧長丞
亦當如今之牧副歟

牧馬監 宋史高宗紀置牧馬監於潮惠二州

馬羣太保 遼史蕭陶隗傳咸熙初任馬羣太保

馭夫 僕夫 周禮夏官校人凡頒良馬而養乘之乘

馬一師四圉二乘爲阜阜一趣馬三阜爲繫繫一馭
夫六繫爲廢廢一僕夫六廢成校校有左右 案由
此言之則廢一僕夫正爲今之廢長六廢成校適如
今之上駟院矣

武備院

武庫令 漢書百官表中尉屬官有武庫令丞 通典
兩漢武庫令屬執金吾

若盧令 漢百官公卿表少府屬官有若盧令丞如潁
曰若盧官名也藏兵器品令曰若盧郎中二十人主

弩射漢儀注有若盧獄令主治庫兵將相大臣案
此則如今武備院大臣而又兼內務府慎刑司之職
矣

軍器監 冊府元龜後周武帝四年置軍器監 唐書
百官志軍器監一人掌繕甲弩以時輸武庫 宋史
職官志軍器監掌監督繕治兵器以給軍國之用

北鞍庫 南鞍庫

尙乘寺 元史百官志尙乘寺掌上御鞍轡及歲造鞍
轡等事 案此卽今北鞍南鞍二庫之所掌也

甲庫

司甲 周禮夏官序官司甲下大夫二人鄭注今之鎧也司甲兵戈盾官之長 案此下有司兵司戈盾司弓矢諸官

函人 周禮攷工記函人爲甲 案今武備院甲庫員外郎二人庫掌五人庫守十有四人掌營造甲冑與其軍器蓋並函人司甲司戈盾諸職爲一官矣
鎧甲署 隋書百官志少府監統鎧甲弓弩等署 通典唐改爲甲坊置有令丞

氈庫

司弓矢 周禮夏官司弓矢下大夫二人中士八人掌
六弓四弩八矢之法 案今武備院氈庫員外郎二
人庫掌五人庫守十有四人掌督造弓矢鞭履凡氈
作之事

弓人 周禮攷工記弓人爲弓

屨人 周禮天官屨人下士二人掌王及后之服屨
案此亦今氈庫官所職掌

弓弩署 見上注 案通典又云唐改弓弩署爲弩坊

署有令丞

奉宸苑大臣

水衡都尉 漢書百官表水衡都尉掌上林苑應劭曰
古山林之官曰衡掌諸池苑故稱水衡張晏曰主都
水及上林苑故曰水衡主都宮故曰都有卒徒武事
故曰尉師古曰衡平也主平其稅入

奉宸大夫 詳見鑾儀衛控鶴注

各苑圍總管大臣

禁圃令 漢百官公卿表水衡都尉屬官有禁圃令

鉤盾令 漢百官公卿表少府屬官有鉤盾令丞 師
古曰鉤盾近苑囿

上林苑令 後漢書百官志上林苑令主苑中禽獸

上林苑監 留青集上林苑之設自漢元鼎置水衡都
尉始後漢上林苑有令丞唐因隋屬司農亦有令丞
宋司園苑無常員仍屬司農明始專設上林苑置左
右監正監副監丞定良牧蕃育林衡嘉蔬四署號虞
官又稱大牧正大虞卿大司籙

華秋苑令 晉書百官志光祿勳統華秋園等令 案

三國魏志注云齊王芳卽位改芳林爲華林故晉志有華林苑令也

苑丞 苑副

苑丞 漢百官公卿表上林苑有五丞

嗇夫 案漢之嗇夫似卽今之苑職

御船處大臣

輯濯令 漢百官公卿表水衡都尉屬官有輯濯令丞
師古曰輯讀與楫同音集濯音直孝反皆所以行船
也 案內務府有 御船處管理大臣兼管司員一

人卽是此職

御茶膳房

內饗 周禮天官內饗中士四人下士八人掌王后及世子膳羞之割烹 案今內務府御膳茶房有尙膳正三人尙膳副一人尙膳十有二人正當此職

鸞儀衛

鸞儀司

職官分紀梁開平初置鸞儀司

儀鸞司

宋史職官志衛尉寺所隸有儀鸞司掌供幕

帟供張之事

左右金吾衙門 左右金吾仗司 六軍儀杖司 案

宋史職官志衛尉寺所隸又有此諸司掌清道徼巡
排列奉引儀杖以肅禁衛

胄曹 唐六典胄曹掌甲杖之事凡御杖之物二百一
十有九羽儀之物三百自千牛以下各分典掌

衛侯司 元史百官志衛侯直都指揮使司秩正四品
攷明史以爲拱衛司卽今之鸞儀司

錦衣衛 明史職官志錦衣衛恆以勲戚都督領之凡
朝會巡幸則具鹵簿儀杖率大漢將軍等共一千五百七員

侍從扈行

鸞儀衛大臣

車正 荀子奚仲作車正楊倞注云夏禹時車正 竹
書紀年殷大戊三十一年命黃侯中衍爲車正 歷
代職官表奚仲爲夏車正蓋卽今鸞儀衛所由昉也
巾車 周禮春官巾車下大夫二人典路中士二人司
常中士二人巾車掌公車之政令典路掌王及后之
五路又云司常掌九旗之物名

車府令 史記秦始皇本紀巾車府令趙高裴駟集解

主乘輿路車

奉車都尉 駙馬都尉 漢書百官表奉車都尉掌御

乘輿車駙馬都尉掌駙馬 案顏師古云駙副馬非

正駕車皆爲駙馬漢初以奉車駙馬二都尉供奉乘

輿最稱親近故霍光任此者幾二十年至三國時多

以戚畹勳舊爲之迨東晉而後惟尙主者始授此職

他人皆不得與遂爲主婿之定名而不知其初實主

侍從車駕卽如今管鑾儀衛大臣之職也

鹵簿使 玉海唐明宗時始有鹵簿使兵部侍郎爲之

歷代職官表當時鹵簿使雖係管攝之官而職在排列督整則如今之管鑾儀衛大臣也

衛尉寺卿 唐六典衛尉寺卿掌邦國器械文物之政令凡大祭祀大朝會則供其羽儀節鉞金鼓帷帟茵席之事 案文獻通攷衛尉秦官漢因之隋開皇三年廢後復置掌軍器儀仗帳幕之事 案秦漢衛尉掌門衛屯兵南齊衛尉掌宮城管鑰乃今護軍統領之職自隋以監門衛掌宮門屯兵而衛尉遂掌儀仗等事是隋以前之衛尉卽今之鑾儀衛而隋以後之

衛尉乃今之護軍統領也

煖卿 蘇軾詩注京師謂衛尉爲煖卿謂其管鑾儀供帳之類

鸞儀衛各員

式道候 漢書百官公卿表式道左右中候候丞爲執金吾屬官應劭曰式道凡三候車駕出還式道候持麾至宮門門乃開東方朔傳宋萬爲式道候

控鶴 元史百官志至元二十年以控鶴一百三十五人隸府正司三十年隸家令司三十一年增控鶴六

十五人立衛侯司以領之兼掌東宮儀從金銀器物
置衛侯一員副衛侯二員及儀從庫百戶 案衛侯
司如今之鸞儀衛掌衛事大臣副衛侯如今之鸞儀
使所謂控鶴者其校尉軍尉旗尉民尉之流歟唐武
后聖歷二年正月置控鶴府監一員丞一員控鶴左
右各二十員以張易之爲控鶴監統左控鶴出入供
奉以麟臺監張昌宗統右控鶴內供奉控鶴之名蓋
始於此然久視元年六月又改控鶴監爲天驥府則
與今之奉宸院相似矣

稱謂錄卷二十

福州梁章鉅撰

男恭辰校刊

領侍衛內大臣

宮正 宮伯 周禮天官宮正掌王宮之戒令糾禁又
宮伯掌王宮之士庶子凡在版者授八次八舍之職
事鄭康成云伯長也衛王宮者必居四角四中於徽
候使也鄭司農云庶子衛王在內爲次在外爲舍
歷代職官表周之宮正當如今之領侍衛內大臣宮
伯當如今之內大臣而宮伯所領衛士在王宮之四

角四中分置八隅則又兼近今護軍統領之職也

案隋書禮儀志後周警衛之制置左右宮伯掌侍衛之禁小宮伯貳之

郎中令 光祿勳 漢書惠帝紀郎中令掌宮殿門戶宿衛屬官武帝更名光祿勳 案胡廣曰勳之言闔也闔者古之門官光祿主宮門故曰勳然則古勳闔通矣

衛將軍 武衛將軍 漢書文帝紀拜宋昌爲衛將軍領南北軍 三國魏志許褚傳遷武衛將軍都督中

軍宿衛禁兵

驃騎將軍 車騎將軍 冊府元龜魏以驃騎車騎武衛爲三將軍分掌禁旅

領軍將軍 左衛將軍 右衛將軍 歷代職官表晉以領護左右衛驍騎游擊爲六軍而領軍及左右衛專司宿衛禁兵卽領侍衛內大臣之職其殿中將軍殿中典兵中郎將殿中司馬督則卽今之侍衛也

案魏文帝受漢禪始以曹休爲領軍將軍主教中壘武衛三營晉武帝初使中軍將軍羊祜統一衛前後

左右驍騎七軍營兵卽領軍之任也懷帝永嘉中改中軍曰中領軍元帝永昌元年復改曰北軍中候尋復爲領軍宋置領軍將軍一人掌內軍護軍將軍一人掌外軍則領軍將軍爲今領侍衛大臣而護軍將軍卽今之護軍統領矣又案晉初置中衛將軍武帝受禪分中衛爲左右衛將軍以羊琇爲左趙序爲右並置佐史皆掌宿衛營兵則左右衛將軍乃爲今之領侍衛大臣而僅稱左右衛猶之言侍衛處耳

左右翊衛大將軍 隋書百官志煬帝改左右衛爲左

右翊衛各置大將軍一人將軍二人總府事其軍士
左右衛所領名驍騎翊衛又加有親侍并領親勳武
三體非翊衛府皆無三侍 案隋志所謂親侍卽今
之親軍校歟

左右衛上將軍 新唐書百官志左右衛上將軍各一
人大將軍各一人將軍各三人掌宮禁宿衛

左右府大將軍 隋書百官志後齊制官領左右府有
領左右將軍領千牛備身 案通典云隋有左右領
左右府大將軍一人將軍二人掌侍衛供御兵丈煬

帝改左右領左右府爲左右備身府置備身郎將管
官唐貞觀中復爲左右領左右府其大將軍將軍皆
如今之領侍衛大臣矣

左右千牛府大將軍 唐書百官志顯慶五年改左右
府曰左右千牛府 案千牛府於龍朔閒改爲奉宸
衛而後又改爲千牛衛神龍二年各置大將軍一人
總判衛事將軍各一人以副之中郎將各一人通判
衛事則大將軍將軍皆如內大臣而中郎將如今之
協理事務侍衛班領矣

千牛衛上將軍 章如愚山堂考索左右衛千牛衛上將軍各一人大將軍各一人將軍各二人掌同左右衛

奉宸衛大將軍 武威衛大將軍 鷹揚威大將軍

豹韜衛大將軍 唐書百官志注龍朔二年改左右千

牛府曰左右奉宸衛光宅元年改左右驍衛曰左右

武威衛左右武衛曰鷹揚衛左右威衛曰豹韜衛

案皆有大將軍等官卽今內大臣之職

羽林軍大將軍 龍武軍大將軍 新唐書百官志左

右羽林軍大將軍各一人將軍各三人掌統北衛禁
兵督攝左右廂飛騎儀丈左右龍武軍大將軍各一
人統軍各一人將軍三人掌同羽林 案羽林宿衛
之官言其如羽之疾如林之多也歷代職官表云唐
十六衛左右衛左右驍衛左右武衛左右領軍衛左
右金吾衛左右監門衛左右千牛衛也皆所稱環列
之官以今制準之惟左右衛掌宮禁宿衛千牛衛掌
侍衛及供御兵丈最與今領侍衛相合又羽林龍武
諸軍統北衛禁軍當時號爲天子親兵亦卽今領侍

衛內大臣之比也

侍衛親軍指揮使 殿前都點檢 殿前都指揮 冊
府元龜五代有侍衛親軍指揮使及殿前都點檢殿
前都指揮之職

殿前司都指揮使 宋史職官志殿前諸班直及步騎
諸指揮之名籍凡統制訓練番衛戍守遷補賞罰皆
總其政令侍衛親軍馬軍所掌如殿前司官工侍衛
親軍步軍如殿前司 歷代職官表宋以殿前司與
侍衛馬步司宿謂之三衛當時稱殿前都指揮使爲

殿帥亦曰殿巖蓋本漢代巖郎爲名實卽今領侍衛
大臣之職也

御帳官 遼史百官志北面御帳官侍衛司掌御帳親
衛之事 歷代職官表遼帳諸官以貴戚爲侍衛武
臣爲宿衛親軍爲禁衛百官番宿爲宿直皆如今領
侍衛之職也

侍衛班領 侍衛什長

五官中郎將 左中郎將 右中郎將 漢百官公卿
表郎掌守門戶出充車騎有議郎中郎侍郎郎中皆

無員多至千人中郎有五官左右三將 案漢之議
郎中郎侍郎郎中並掌守門戶出充車騎與今之侍
衛無異矣而中郎以五官左右三將轄之正如今之
侍衛班領與什長矣

車將 戶將 騎將 漢百官公卿表郎中有車戶騎
三將如淳曰立車曰車郎主戶衛曰戶郎漢儀注郎
中令主郎中左右車將主左右車郎左右戶將主左
右戶郎也

期門僕射 虎賁中郎將 漢百官公卿表期門掌執

兵送從武帝建元三年初置比郎無員多至千人秩比千石平帝元始元年更名虎賁郎置中郎將秩比二千石案期門比郎無員則亦今之侍衛也其所置僕射中郎將卽班領與什長矣

羽林令 羽林丞 羽林監 漢百官公卿表羽林有令丞宣帝令中郎將騎都尉監羽林秩比二千石案漢表言羽林掌送從次期門羽林亦侍衛也所置令丞監亦卽其班領什長也

侍衛

侍衛 史記弟子傳王肅註子路爲孔子侍衛故人不
敢有惡言侍衛二字始此 諸葛亮出師表侍衛之
臣

周衛 文選太史公報任少卿書出入周衛之中注周
衛言宿衛周密也韋昭曰天子有宿衛之官

環列之尹 左文元年傳注環列之尹宮衛之官列兵
以衛王宮 唐類函輦轂之衛環列之尹 錢翊授
高彥宏金吾衛將軍制云常爲環尹

虎賁氏 旅賁氏 周禮夏官虎賁氏掌先後王而趨

以卒伍軍旅會同亦如之舍則守王閑王在國則守王宮旅賁氏掌執戈盾夾王車而趨西京賦陳虎旅於飛廉案周之虎賁旅賁有下大夫中士下士之別正近今侍衛分頭二三等及統領者所由昉也

期門虎賁郎漢書百官公卿表期門掌執兵送從武帝建元三年初置比郎無員多至千人有僕射秩至千石平帝元始元年更名虎賁郎

羽林郎後漢百官志羽林郎掌宿衛侍從武帝以便馬從獵還宿殿陛巖下室中故又號巖郎羽林左監

主左騎右監主右騎

羽林騎

羽林孤兒

漢書百官公卿表羽林掌送從

次期門武帝太初元年初置名曰建章營騎後更名羽林騎又取從軍死事之子孫養羽林官教以五兵號曰羽林孤兒

直閣將軍

直寢

直齋

直後

隋書百官志左右

衛掌宮掖禁禦督攝仗衛又各有直閣將軍六人直寢十二人直齋直後各十五人並掌宿衛侍從

千牛備身

備身左右

備身

唐書高祖紀隋文帝

以高祖爲千牛備身主北魏置千牛備身掌執御刀
千牛刀名因爲官號 案隋朝左右領左右府各大
將軍一人將軍一人掌侍衛左右供御兵仗領千牛
備身十二人掌執千牛刀備身左右十二人掌供御
刀箭十六人掌宿衛侍從唐爲左右千牛衛領左右
千牛備身各十二人掌執御刀宿衛侍從皆以高蔭
子弟年少姿容美麗者補之服花鈿繡衣緣執象爲
貴門起家之良選又備身左右十二人執御弓箭宿
衛侍省備身各一百人掌宿衛侍從則千牛備身如

今之侍衛班領備身左右如今之侍衛什長而單稱身者如今之一二三等侍衛矣又案隋書各將軍下均有左右備身又有刀劍備身騎官備身內直備身太子備身太子騎官備身太子內直備身

奉裕 通典注左右千牛備身龍朔中改爲左右奉裕

咸亨初復舊垂拱二年又改爲奉裕神龍元年復舊

百騎 千騎 萬騎 通典隋煬帝改左右領軍爲左

右屯衛所領兵爲羽林唐貞觀十二年於元武門置左右屯營以諸衛將軍領之其兵名曰飛騎又於飛

騎中簡材力驍捷善射者號爲百騎扈從游幸則衣
五色袍乘六閑馬賜猛獸衣羈龍朔二年改左右屯
營爲羽林軍武后臨朝永昌元年改百騎爲千騎天
授中改軍爲衛中宗景龍元年改千騎爲萬騎案
此與今之侍衛適相近似曰百騎曰千騎曰萬騎猶
之有一等二等三等之分矣

四怯薛 元史兵志太祖功臣博爾忽今國語博爾

木今國語木華黎今國語赤老溫今國語太

祖命其世領怯薛今國語之長番直宿衛 歷代

職官表元之四集賢以功臣之後世領宿衛與今侍衛官員定爲上三旗額缺者其制頗屬相近

衙內五衛 唐書儀衛志朝會五仗號衙內五衛一曰供奉仗左右衛爲之二曰親仗親衛爲之三曰勳仗勳衛爲之四曰翊仗翊衛爲之五曰散手仗以親勳翊衛爲之皆帶刀捉杖列坐於東西廊

區士 臆乘衛士稱爲區士

龍捷左右軍 虎捷左右軍 五代會要周廣順四年改侍衛馬軍曰龍捷左右軍步軍曰虎捷左右軍

八旗都統

長水校尉 胡騎校尉 漢百官公卿表長水校尉掌
長水宣曲胡騎又有胡騎校尉掌池陽胡騎師古曰
長水胡名宣曲觀名胡騎之屯於宣曲者池陽則胡
騎之屯於池陽者也

南北部大人 四部大人 八部大人 魏書官氏志
昭成卽位諸方雜人來附者總謂之烏丸分爲南北
部置二部大人以統攝之天興元年又置八部大人
於皇城四方四維以擬八座謂之八國 資治通鑑

魏初置四部大人至王庭決辭解訟 案此正與今
八旗都統之制相仿至八國之中又各立大師小師
令辦其宗器品舉人才則亦如今之參領佐領也
天下兵馬大元帥 王海唐天寶末置天下兵馬大元
帥都統朔方盧龍節度都統之名自此始

步軍統領

司隸 周禮春官司隸掌五隸之法帥其徒以搏盜賊
凡囚執人之事 通典漢置司隸掌諸巡察近今之
巡城 按此漢司隸校尉所自出卽今步軍統領之

權輿也

中尉 春秋左氏傳將歸死於尉氏杜注討姦之官

唐六典中尉秦官掌徼巡京師 通典北軍中尉主

之掌京師門內之兵

執金吾 漢書百官表太初元年中尉更名執金吾應

劭曰吾禦也掌執金革禦非常顏師古曰金吾鳥名

主辟不祥天子出行職主先導以禦非常因以名官

崔豹古今注云金吾棒也以銅爲之黃金塗兩末

舊武 軍正 漢書王莽傳莽更名執金吾曰舊武中

尉曰軍正

司隸校尉 司察 漢書百官表司隸校尉武帝征和
四年初置又蓋寬饒傳寬饒司隸校尉宣帝予書曰
命君以司察之位

步兵校尉 漢百官公卿表步兵校尉掌上林苑門屯
兵 案此與今之步軍統領所掌雖殊而名義則相
近矣其掌上林苑屯兵則爲今 圓明園護軍營總
統大臣之職也

臥虎 傳咸傳司隸校尉舊號臥虎誠以舉綱萬目理

提領而衆毛從者也

九門提督

金吾 通典漢金吾緹騎二百人提戟五百二十人隋
改金吾爲左右武侯衛所領軍士名欽飛則於前鋒
統領相近

城門領

城門校尉 漢百官表城門校尉掌京師城門屯兵
前鋒統領

掌舍 周禮天官掌舍掌王之會同之舍設楹柝再重

設車宮轅門爲壇墮宮棘門爲帷宮設旌門凡舍事則掌之 歷代職官表掌宿於王行所止舍設棹栳再重鄭注謂行馬再重以周衛有內外列正如今前鋒統領於御營安設卡倫之職也

都督前鋒軍事 晉書應詹傳以詹爲都督前鋒軍事案前鋒之名實昉於此

左右武侯大將軍 隋書百官志左右武侯掌車駕出先驅後殿晝夜巡察煬帝改左右武侯爲左右候衛案左右武侯正今前鋒都領之職而所司烽候道

路水草所置則兼今鄉導大臣之職也隋志又言左右武侯各置大將軍一人將軍二人煬帝時又置護軍四人掌副貳將軍將軍無則一人攝尋改護軍爲武賁郎將正四品而置武牙郎將六人副焉大將軍軍將軍正如今之統領而武賁郎將及武牙郎將如今之參領矣

先鋒使 先鋒都統 遼史百官志先鋒使司先鋒都統所御營都統所

前鋒侍衛

佽飛 漢百官公卿表少府屬官有左弋令丞武帝太
初元年更名左弋爲佽飛 案隋百官志言左右候
衛所領軍士名佽飛則佽飛猶今之前鋒侍衛及前
鋒校矣

護軍統領

宮伯 周禮天官宮伯掌王宮之士庶子凡在版者授
八次八舍之職事 歷代職官表周之宮伯掌王宮
士庶子實近今領侍衛內太臣而所授八次八舍分
置八隅以衛王宮則兼有今護軍統領之職

衛尉 初學記案齊職儀衛尉秦官也掌宮門衛屯兵
西京賦衛尉八屯警夜巡晝

太尉 漢書始建國元年莽更名衛尉曰太尉

護軍都尉 護軍中尉 文獻通攷秦有護軍都尉漢
因之高祖以陳平爲護軍中尉盡護諸將然則復以
都尉爲中尉矣元狩四年以護軍中尉屬大司馬於
時復爲都尉矣元壽元年更名司寇元始元年更名
護軍 案此卽護軍之名所由始

左右武伯 司伯 胡三省通鑑注後周置左右武伯

掌內外衛之禁令 周書武帝紀建德三年衛王道反突入肅章門司武尉遲運拒守

左右監門衛大將軍 唐六典左右衛大將軍各一人將軍各二人掌諸門禁衛門籍之法 案隋初有左右監門府將軍各一人掌宮殿門禁及守衛事唐龍朔二年改府爲衛大將軍各一人將軍各二人以副之中郎將各四人分掌諸門以時巡檢蓋大將軍如今之統領將軍如今之參領而中郎將則如今之護軍校也

皇城司幹當官 宋史職官志皇城司幹當官七人掌宮城出入之禁令凡周廬宿衛之事宮門啟閉之節皆隸焉

御營使 資治通鑑後唐天威二年朱守殷反遣御營使石敬瑭討之 歷代職官表後唐始置御營使掌行營守衛之事正近今之前鋒統領也

行營兵馬都統副都統 遼史兵衛志凡舉兵皇帝親點將校又選勳戚大臣充行營兵馬都統副都統都監各一人 案此雖爲行營而設然都統尉都統皆

具實與今八旗都統相近也

右皮室詳穩 遼史兵衛志遼太祖以行營爲宮選諸部豪健置爲腹心部皇后述律氏居守摘蕃漢精銳二十萬爲屬珊軍以珍美如珊瑚故名太宗益選天下精甲置諸瓜牙爲皮室軍然太祖以耶律古老爲右皮室詳穩則皮室自太祖時已有案屬珊皮室謂之二帳皆御帳親軍然則皮室詳穩亦足當今之護軍統領矣

護軍校

左右阿速衛 哈喇婁 元史百官志左右阿速衛今國

語改阿蘇衛 掌宿衛城禁又哈喇婁掌守禁門等處應直

宿衛 案今皆如護軍之職